

JONEME

PEPA PIAMO LAPONGE DOKO

Pii atupa wambao kandapenge

Joneme pepa laponge dake pyao pyasoo pituu, “enda epe Goteme yapao nyepae dokopi embanya wanepi” dupanya pepa dake pyao peekelyona lea-pyaa. Dopa leamo doko sosa mendenya Kitisene dupa kandao lao pia. Pii dutupame Kitisene dupanya masingi sakatasakamaiyoo mendeme mende auu kaya kaya pyoo katena lao lea-pyaa.

Joneme pepa piamo laponge dokonya pii lyaa dupa:

- 1-3 Pii wambao pepanya piamo dupa
- 4-6 Mende auu kaya kaya pingi mana doko mupa
- 7-11 Sambo pii dupa wandyu kalyepape
- 12-13 Joneme pii etao lasa leamo dupa

¹Namba^a sosanya isingi akali dokome emba enda^bepe Goteme yapao nyepae dokopi embanya wanepi nyakamanya pepa dake pyao peekelyo. Nambame nyakama kini auu kaelyo. Dee nambame iki daa. Kiningi pii doko masoo kalyamino endakali dupa pitakame nyakama auu kaelyaminoaka. ²Naimame^c kiningi pii doko minao kalyamano dokonya nyakama auu kaelyamano. Naimame kiningi pii doko tanga tangapi minawaka katatama. ³Naimanya Takange Gotepa baanya Ikiningi Jisasa Kataisapame naima kandao mona epe palyetala kondo kayao naimanya mona

^a 1 1 Pi 5:1; 1 Jo 2:21; 3 Jo 1 ^b 1.1 *enda* Enda dokopi baanya wanepi latae silyamo doko sosa mendenya endakali dupa kandao latae joo pilyamo lao masylyamano. ^c 2 Jo 14:17

doko lyuu lasakatambinopa, naimame kiningi pii doko lao endakali auu kayao katamana.

**Auu kaenge manapa kiningi piipa dolapo
watao minapengena leamo doko**

⁴Naimanya^d Takangeme mana seteamoli pyoo enda embanya wane mendapuame kiningi pii doko minao payaminopa nambame kandatala mona etete yaepeo. ⁵Dee^e indupa naima pitakame auu kayaloo pyoo katamana lao nambame enda epe emba langilyo. Nambame mana setapae enenge mende embanya pepa pyao peakala naelyo. Daa, wamba waka kandasoo mana setapae nyiamano ongoaka pyao peekelyo. ⁶Naima^f auu kayaloo pyoo katenge dokome naimame Gotenya mana setapae dupa watao miningi. Nyakamame mana setapae doko watao minalapape lapae pii doko wamba waka kandasoo siami.

⁷Isa^g yuu dakenya minakasingi endakali longo payatelyamino. Dutupame Jisasa Kataisa yonge katao epeana lao panasala naengema. Endakali dopale dupame endakali dupa minakasoo Kataisanya yandapipi joaka kalyamino. ⁸Naimame piamano dupa mee jala nayatamopa nyakamame yole pitaka nyetamanopa lao nyakamame nyakama tange isokondape pipenge. ⁹Kataisanya^h mana pii lapae doko yalatala waka mende konda pyoo miningi endakali ongome Gote minala naenge. Mana pii lapae angi miningi endakali dokome Takangepa Ikiningipa lapota miningi. ¹⁰Endakaliⁱ mendeme nyakama katatamino ongonya ipao pituu, mana pii lapae doko naminao ipatamo kandao doko, baa nyakamanya andaka taeme ipame lamo lao lanyala nayalapape. ¹¹Emba taeme epene lamo latamo endakali dokome baanya kalai koo dupanya awapa pitambinosaka pita.

Joneme etao lasa leamo pii dupa

¹²Nambame^j nyakamanya pii longo pepa pyakapenge silyamoaka doko, pepapi pyanjolepi dokome iki pyao langipu laka lao masala naelyo. Daa, naima mona etete yaepakondape pyoo katamana lao namba nyakama kalyamino ongonya ipupala enomba kandao pii langito lao masilyo. ¹³Embanya kakingi Goteme yapao nyiamo dokonya wane dupame emba auu pyoo pitipi lelyamino.

^d 4 3 Jo 3 ^e 5 Jo 13:34, 15:12,17; 1 Jo 2:7, 3:11 ^f 6 Jo 14:15,23-24; 1 Jo 5:3 ^g 7 Mt 7:15;
1 Jo 2:18,22, 4:1-3 ^h 9 1 Jo 2:23-24, 4:15 ⁱ 10 Lo 16:17; Ep 5:11; 2 Te 3:6; Ju 4
^j 12 1 Jo 1:4; 3 Jo 13-14